

բաղաբապետ է եղել, սակայն ձիավորեցուցանելու առաջին վկայությունը հանդիպում է 12-րդ դարի երկրորդ կեսին: Այսպես, Լամբրոնի իշխան Օշինը (1140—1170 թթ.) «եռ մկրտել զՀեթում (Օշինի որդին—Ս. Բ.) և արար ձիավոր և պատկեաց ընդ դուստրն իւր ի մի օր և ուրախացան յոյժ»<sup>77</sup>:

Այս վկայությունը կարևոր է նրանով, որ հերքում է ֆրանսիացի պատմաբան հայագետ Ժակ դը Մորգանի և Ղևոնդ Ալիշանի այն ենթադրությունը, որ մինչև 1193 թ. Լեոն Բ-ի կողմից Անտիոքի իշխանության լծության թոթափումը հայ իշխանները իրավունք չեն ունեցել ձիավորեցուցանել իրենց ավատառու իշխան ասպետներին<sup>78</sup>:

Վերոհիշյալ պատմաբանները գրում են, որ Լեոն Բ-ը բազմաթիվ ազատներին շնորհեց ասպետի կոչում<sup>79</sup>: Բայց մեզ չհաջողվեց գտնել որևէ վկայություն այդ մասին: Իհարկե, «ձիավորեցուցանելու» բազմաթիվ վկայություններ կան Լեոն Բ-ի հաջորդների վերաբերյալ: Այսպես, 1256 թ. Հեթում Ա թագավորը Իկոնիայի սուլթանի դեմ տարած հաղթանակից հետո «բազում ասարավ դարձաւ աշխարհն իւր և ուրախացաւ ոչ սակաւ աւուրս ի սոյն ամի Զէ (1256 թ.) կամեցաւ թագաւորն Հեթում ձիավորեցուցանել զԱնդրանիկ որդին իւր Լեոն (15 նոյեմբեր 1256 թ.) և յեկն ի մայրաքաղաքն Մսիս և առաքեաց յԱնտիոք և կոշեաց իշխանս և որ ի վանձրէից զամենայն դասս եկեղեցականցն ժողովեաց յառաջիկայ ուրախութեան գործին և ձիավորեցոյց զնա ի թուականին Զե (1256) յամենայն նոյեմբերի ժե օրն, և ուրախացաւ թագաւորն ուրախութեամբ մեծ հանդերձ հարբն իւրովն և ամենայն զարմուքն և ժողովովն որ եկեալ էին»<sup>80</sup>:

Հեթում Ա-ը 1264 թվին թող ունենալու կապակցությամբ շատերին պարգևում է ձիավորի աստիճան: «Ի սոյն ամի ԶԺԳ (1264) որ և բազում ի վաթիարագոյնից և յանգերագոյն ազգաց նաև ի ներքինեաց ևս փառաց և պատուոյ ձիավորութեան արժանացան»<sup>81</sup>:

Նույնը կատարվում է Լեոն Բ-ի մկրտության առթիվ. «Եւ յաղագս այսմ ուրախութեան պատճառի զերկոսս որդիսն սպարապետին հայոց Սմբատայ՝ զՀեթում և զՎասիլ մականունն Թաթար ձիավորեցուցին և այլ բազումս ընդ նոսա...»<sup>82</sup>:

Հեթում Ա-ի հաջորդ՝ Լեոն Գ-ը իր երկու որդիներին՝ Թորոսին և Հեթումին «ձիավորեցուցանելու» առթիվ (որը տեղի է ունենում Աստվածահայտնության տոնին), այդ թվում «ձիավորեցուցանում է» «և այլ մանկունք իշխանաց և արք յարքունական»<sup>83</sup>:

Թեև հետագա շրջանի համար մենք չունենք «ձիավորեցուցանելու» մասին այլ վկայություններ, սակայն այդ սովորությունը մնացել է մինչև թագավորության վախճանը: Այդ երևում է նրանից, որ 1374 թվին Լեոն Զ թագավորին օծության առթիվ վերջինս «ձիավորեցուցանում» է իր համհարզներից մեկին:

77 «Սմբատ Սպարապետի տարեգիրք ի Վենետիկ», 1956, էջ 171:

78 Ղ. Ա ի շ ա ն, Սիսուան, էջ 466: Ժ ա կ դ ր Մ ո Ր զ ա ն, Հայ ժողովրդի պատմություն, էջ 259:

79 «Սմբատ Սպարապետի տարեգիրք», 1956, էջ 231:

80 Նույն տեղում, էջ 244:

81 Նույն տեղում, էջ 245:

82 Ղ. Ա ի շ ա ն, Սիսուան, էջ 405:

83 Ղ. Ա ի շ ա ն, Սիսուան, էջ 405: